

Heimastjórn

Eftirfarandi bréf var sent frá nágrönnum eldsneytisafgreiðslu N1 á Djúpavogi til Umhverfis og framkvæmdaráðs þann 12. Maí sl:

Hér með er óskað eftir því að starfsleyfi N1 við Búland á Djúpavogi verði felld úr gildi.

Það er megn óánægja með sjálfsafgreiðslustöð N1 við Búland á Djúpavogi meðal íbúa þar í grennd og þeir sem búa þarna næst vilja þetta í burtu sem fyrst enda veldur stöðin miklu ónæði. Þegar stöðin var sett upp voru íbúarnir ekki spurðir og framkvæmdin fór ekki í grenndarkynningu á sínum tíma og það var heldur ekki gert síðast þegar starfsleyfi var endurnýjað. Við viljum að losna við þessa starfsemi sem fyrst.

Stöðin veldur miklu ónæði, sérstaklega á næturnar þannig að það truflar svefnfrið þeirra sem búa í næsta nágrenni við stöðina, ekki síst þegar stórir flutningabílar leggja þar til að taka eldsneyti og drepa ekki á bílunum á meðan. Stöðin er aðeins 27 metra frá næsta íbúðarhæúsi og það gefur auga leið að þegar kannski þrír stórir flutningabílar koma þangað til að taka eldsneyti veldur það verulegum truflunum og skerðingu á lífsgæðum. Einnig ber töluvert á því að ferðafólk geri þarfar sínar við stöðina eða hlaupi bak við vegg á verslunarhúsinu til að gera það á meðan er verið að dæla á bílana þar sem engin klósettaðstaða er við stöðina og því mikill sóðaskapur sem fylgir starfseminni. Þá er þó nokkuð um það að fólk banki upp á í næstu húsum þegar aðstoð vantar við dælurnar og veldur það þó nokkurri truflun. Með auknum ferðamannastraumi hefur þessum truflunartilfellum fjölgað.

Við vorum alltaf að bíða eftir að starfsleyfið myndi renna út og héldum í einfeldni okkar að það kæmi inn til sveitarfélagsins til umfjöllunar eða yrði auglýst með áberandi hætti en þar sem framlenging starfsleyfisins var auglýst „í kyrrþey“ á heimasíðu HAUST sem fáir fylgjast með fór því auglýsingin fram hjá okkur öllum. HAUST uppfyllti þannig lagaskyldur sínar en komst þannig hjá því að almenningur sæi auglýsinguna. Málsmeðferð af þessu tagi teljum við vera valdniðslu gagnvart íbúunum.

Ekkert deiliskipulag er til fyrir afgreiðsluna en það er skilgreint sem miðsvæði í aðalskipulagi. auðvitað ætti fara fram grenndarkynning áður en gefið er út byggingar- eða framkvæmdarleyfi í þeim tilfellum þar sem deiliskipulag liggur ekki fyrir en eins og áður kom fram var það ekki gert. Þessi starfsemi „sjálfsafgreiðsla á eldsneyti“ rúmast að okkar viti ekki innan starfsemi á miðsvæðum eins og hún er skilgreind í [skipulagsreglugerð](#) og er þar með ekki í samræmi við aðalskipulagið. Ef það er raunin eru forsendur starfsleyfis væntanlega brostnar.

Þá er því við að bæta að við teljum þessa starfsemi ekki samrýmast þeirri stefnu sem mörkuð hefur verið á Djúpavogi og nefnd er Cittaslow þar sem markmiðið er að auka lífsgæði íbúa en eldsneytisafgreiðslan dregur verulega úr lífsgæðum þeirra sem búa í nágrenni afgreiðslunnar.

Við óskum hér með eftir að starfsleyfi eldsneytisafgreiðslu N1 á Djúpavogi verði felld úr gildi.

Samrit sent til:

HAUST

Úrskurðarnefnd umhverfis og auðlindamála

Virðingarfyllst, nágrannar eldsneytisstöðvarinnar:

Erindið fékk eftirfarandi afgreiðslu hjá nefndinni án þess að nokkurt samband væri haft við þá sem erindið sendu eða heimastjórn:

Umhverfis- og framkvæmdaráð þakkar erindið en bendir á að sveitarfélagið er ekki leyfisveitandi þegar kemur að útgáfu starfsleyfa heldur Heilbrigðiseftirlit Austurlands. Eins og

ráðið hefur áður bókað undir máli nr. 202205010 er rekstur eldsneytisafgreiðslu á Búlandi 1 í samræmi við gildandi skipulag. Umhverfis- og framkvæmdaráð vísar erindinu til Heilbrigðiseftirlits Austurlands.

Áður hafði Umhverfis og framkvæmdaráð afgreitt erindi um sama málefni frá Heimastjórn með eftirfarandi bókun:

Umhverfis- og framkvæmdaráð vísar því til gerðar nýs aðalskipulags að finna hentuga staðsetningu fyrir bensínafgreiðslu á Djúpavogi.

Það er okkur íbúnum mikil vonbrigði að svo snautlega hafi verið staðið að afgangi málsins og þarfir fyrirtækisins teknar fram yfir þarfir íbúanna. Með því að Því óskum við eftir því að heimastjórn beiti sér fyrir því við Sveitarstjórn að Aðalskipulagi á þessum hluta verði breytt hið snarasta til þess að skapa aðstæður fyrir færslu á stöðinni. Ef ekki á að gera neitt í málinu fyrr en við gerð nýs aðalskipulags er ljóst að mörg ár munu líða þar til stöðin verður færð miðað við þann tíma sem hefur farið í skipulagsbreytingar hjá Múlaþingi til þessa.

F.h. nágranna eldsneytisafgreiðslunnar
Kristján Ingimarsson